

2020-mut Aningaasanut Inatsisissatut siunnersuut

(Aningaasaqarnermut Nunanilu Avannarlerni suleqatigiinnermut Naalakkersuisoq)

Akissuteqaat

(Aningaasaqarnermut Nunanilu Avannarlerni suleqatigiinnermut Naalakkersuisoq)

Aappassaaneerinninneq**Aallaqqaasiut**

Aallaqqaammut Aningaasaqarnermut Akileraartarnermullu Ataatsimiititaliaq 2018-imut aningaasanut inatsisissatut siunnersuummik, Naalakkersuisullu aappassaaneerinninnermut atatillugu allannguutissatut siunnersuutaannik sukumiisumik suliarinnissimaneranik Naalakkersuisut sinnerlugit qutsavigissavara.

Aappassaaneerinninnermi allannguutissatut siunnersuut

Aappassaaneerinninnissamut Naalakkersuisut katillugit aningaasaliissutinut allannguutissatut siunnersuutit 50-it, oqaasertaliussanullu allannguutissatut siunnersuutit 12-it saqqummiuppaat. Allannguutissatut siunnersuutit IST-p inernissaatut missingersuutigineqartup 2020-imi 19,7 mio. kr.-nik piffissamilu ataatsimut aningaasanut inatsisiliorfiusumi 2020-2023 72,3 mio. kr.-nik ajorseriarneranik nassataqassapput.

Ilinniartitaanermut immikkoortumut 2020-mi 4,7 mio. kr.-inik, 2021-mi 8,3 mio. kr.-nik kiisalu 2022-mit 10,2 mio. kr.-inik ilinniartitaanerit marluk ilinniartoqatigiiaallu allanik ataatsinik ilaneqarnissaannut aningaasalersuutissanik qinnuteqartoqarpoq. Ilinniartitaanerit marluk nutaat Niuernermik Ilinniarfimmiissapput, taamaalillunilu 1. februar 2020-mit aallartittumik Aningaasarsiornermi Isumalluutinillu aqutsinermi kiisalu Nunat tamat akornanni Niuernermik Nittarsaassinermillu bachelorinnngorniarnert neqeroorutiginnissaannut periarfissiisoqassaaq. Ilinniartoqatigiiaat allat ataatsit peqqissaanermik ikiortitit ilinniarnermut qinnuteqartartut amerliartornerat tunuliaqutaralugu pilersinneqassapput. Ilinniartitaanerit amerliartornerat ilinniartitaanerullu annertusiartornera nuannaarutissaasoq Naalakkersuisut oqaatigiumavaat. Ilinniartitaanerup qaffakkiartornera aningaasarsiornermut kiisalu inuiaqatigiit aaqqissuussaaneranni ajornartorsiutit ungasissumut sammisut passunneqarnissaannut pingaarutilimmik toqqammavissaapput.

Innarluutillit ulloq unnuarlu angerlarsimaffiinut 2020-mi 2021-milu 20,8 mio. kr.-it Ilulissani Sungiusarfik Ikinngummi illutap nutaap naammassineqarnissaanut atugassanngortinneqarnissaat qinnutigineqarpoq. Aningaasat atugassanngortinneqarnerisigut oktober 2019-milu ilassutit aningaasaliissutit akuersissutigineqarnerisigut 2021-p tungaanut suliniummut katillugit 56,4 mio. kr.-it immikkoortinneqarsimalissapput. Illuutit nutaat

atulernerisigut inuit innarluutillit ullutsinnut naleqqunnerusumik sinaakktissaqartinneqalissapput, sinaakktuillu Inuit Innarluutillit pillugit Inatsisartut inatsisaannut ulloq 1. januar 2020-mi atuutilersussap imarsiaanut naapertuunnerulissapput. Taamaalilluni nunatsinni inunnet innarluutilinnut atugassarititaasut pitsaanerulernissaannut annertuumik siumut alloriartoqartoq Naalakkersuisut isumaqarput.

Utoqqaat angerlarsimaffiit aningaasaliissutini Maniitsumi Sisimiunilu utoqqaat illuanni puigortunngormermik nappaatilinnut immikkut immikkoortortaliornissap pilersaarusiornissaanut tapiissutit immikkoortinneqarneqarput. Immikkoortut taakku ineqartut, qanigisaasut sulisullu toqqissisimanartunik sinaakkuteqalernissaat iligimagineqarpoq.

Isertitassatut inatsisillu naapertorlugit aningaasaliissutit allanngortinneqarnissaannut allannguutissatut siunnersuummik ataatsimik saqqummiussisoqarpoq. Allannguutissatut siunnersuut IST-mik angusassatut missingiussamik ukiumut 8 mio. kr-inik ajornerulersitsissaaq. Ajorseriaat inissiatini inissianut inoqanngitsunut aningaasartuutit qaffakkiartornerisa malitsigisaannik pissaaq. Immikkoortumi aningaasartuutit qaffakkiartornerat piffiit ilaanni inissianik sinneruttoorutit amerlinerannik kiisalu inissiat pitsaangippallaarnerisa nassatarisaannik inoqannginnerannik tunuliaqutaqarpoq.

Oqaasertaliussasanut siunnersuutini allannguutissanik 12-inik saqqummiussisoqarpoq, taakkulu teknikimut oqaatsillu atornerarnerinut tunnganerupput. Immikkulli filmiliornermik ingerlatsisut akileraarutini akiliutinik utertitsisinaanermut periarfissiisumik oqaasertaliussassatut siunnersuusiorneq taaneqassaaq, taamaaliornikkut filmiliat angisuut Kalaallit Nunaannik pilersarinnerneqarnissaat ajornannginnerulissaaq. Taamaaliorneq nunatta ilisimaneqarnerulerneranik suliaqarnerulernerimillu pilersitsissaaq. Oqaasertaliussassalli kisimiissanngimmata, filmiliornerulli siuarsarneqarneranut Inatsisartut aningaasaliissutaannit ikorfartorneqassammata erseqqissaatigineqassaaq.

Aningaasaqarnermut Akileraartarnermullu Ataatsimiititaliap aappassaaneerinninnermut isumaliutissiisutaa

Aningaasaqarnermut Akileraartarnermullu Ataatsimiititaliap aappassaaneerinninnissamut isumaliutissiisummini Naalakkersuisut allannguutissatut siunnersuutit saqqummiussaasa amerlanerpaartaasa akuersissutigineqarnissaat inassutigaa, ataatsimiititaliallu allannguutissatut siunnersuutitut 11-t isummernissani kinguartippaa.

Pingajussaaneerinninnissamut allannguutissatut siunnersuutissatut naatsorsuutigineqartut

Akileraarutitut akitsuutinullu missingiutit nutaat malitsigisaanik, kiisalu aningaasanut inatsisissatut siunnersuut pillugu partiinik isumaqatiginninniarnit inernerisa malitsigisaannik pingajussaaneerinninnissamut allannguutissatut siunnersuummik saqqummiussisoqarnissaa naatsorsuutigineqarsinnaavoq.

Tamatumalu sanitigut ukiumi aningaasanut inatsiseqarfiusuni 2020-mit 2023-mut isertitat aningaasartuutillu oqimaaqatigiinnerinik qulakkeerinnittussanik allannguutissatut siunnersuummik saqqummiussisoqarsinnaanera naatsorsuutigineqarsinnaavoq. 2020-mut aningaasanut inatsisip akuersissutigineqarnerani isertitat aningaasartuutillu

oqimaaqatigiinnissaat Naalakkersuisut pingaartippaat, tamannalu aningaasanut inatsit pillugu partiinik politikikkut isumaqatiginninniarnermi soorunami aamma pingaartinneqarpoq. Isumaqatiginninniarnert taakku pitsaasumik ingerlanneqarput, piffissarlu manna iluatsillugu Inatsisartuni partiit tamaasa pissarsiffiulluartumik aningaasaqarnermut politikissamut anguniakkaminnik kissaatiminnillu saqqummiussisarnerinut qujassuteqarfigiumavakka.

Naggasiut

Inuinnaat naalakkersueqataanerat suleqatigiissoq, aningaasaqarnikkut piujuartitsisumillu toqqammaveqartumik, isumaqatigiissinnaasuseqarnermut akuersaarsinnaasuseqarnermillu takutitsisumik, taamatullu akiligassanik akilerneqanngitsunik kinguaassatsinnut ingerlatitseqqiffiunngitsumik politikikkut piginnaaneqarnermik qularnaarinninnissamullu piumassuseqarnermik atulersitsinermillu aamma ilisarnaateqassaaq. Naalakkersuisut taamatut piumassuseqarnerat qularutigineqassanngilaq.

Naggasiullugu Naalakkersuisut sinnerlugit 2020-mut aningaasanut inatsisissatut siunnersuut pillugu partiinik politikikkut isumaqatiginninniarnernik nanginneqarnissaat qilanaaralugu oqaatigissavara. 2020-mut aningaasanut inatsisissatut siunnersuummik pingajussaaneerinnineq sioqqullugu Naalakkersuisut isumaqatigiisummik saqqummiussinerannik sulineq inerneqassasoq naatsorsuutigineqarpoq. 2020-mut aningaasanut inatsit amerlanerussuteqarluartumik taperserneqarlunilu tunuliaqutserneqassasoq Naalakkersuisut neriuutigaat.

Taama oqaaseqarlunga aningaasanut inatsit pillugu pitsaasumik pissarsilluarfiusumillu oqallinnissaq qilanaarigakku oqaatigissavara.